

## Plenchi

### Bèl a bati

Tring tring.....Bèlèm bèlèm ata e ora a yega pa nos subi plenchi na bòshi. Ta un plaser di topa hende positivo i ku gana di wordu informá di kosnan positivo ku ta pasa den nos skolnan. Eksamen ta tras di lomba, awor ta di warda resultado aki 2 siman. Ban spera ku e resultado ta satisfaktorio. Si no ta asina ainda tin chèns pa hèr pa slaag ainda, òf pa hèr i drecha e sifranan poko mas.

Otro mayornan ta preparando pa nan yu bai skol pa di promé biaha ougustus. Nan ta yen di espektativa pa e temporada di skol. Mayornan no floha e interes, keda ku interes den bo yu su skol semper. Den tur loke ta toka su persona. Bo no tin mester di sinta man krusá kombersá ku ne. Pero bo por hasie meintras boso ta kome huntú, laba kos of paña huntú. Kore den outo huntú, kana huntú pa kondishon. Buska momentunan fiho pa boso por ta huntú ku otro regular tur dia. Esei ta krea un relashon entre boso, pero tambe ta yuda boso ta habri pa papia ku otro. No papia bo so. Siña ku silencio tambe ta importante pa asina e tuma kurashi pa bisabu su kosnan. Siña skucha i no papia i prediká bo so tur ora. Nan ta sròp di skucha ora bo keda moralisá i prediká kontinuamente den nan kabes. Hasi preguntanan habri ku ta duna chèns pa bo sa kon e ta pensa òf sinti. P.e. Kon a bai na skòl? E pregunta ei ta grandi i mayoria biaha e kontesta ta, ...bon. Purba e pregunta: Kiko a pasa prèt awe na skol? Kiko tabata mas leuk, menos leuk etc.

Konta bo tambe kiko a bai leuk of no leuk ku bo mes awe. E ta habri kaminda pa kompartí eksperensha.

Lès na skol ta importante, pero siña konose bo yu tur dia miho ta un mester. E ta bon pa abo i pa e. Asina bo por guie mihó si bo sa kiko ta interesé of preokupé. Anto tuma su preokupashon na serio. No responde manera ta kèns e ta òf e ta hasi koi loko. Bo tambe tabata yon un tempu ku bo preokupashonnan. Si e tin miedu di skuridat ta normal, pone un lus chiki pe den kamber. Siñe resa ora e tin miedu òf ta insigur. Resa ta duna forza i kurashi. Kòrda ku bo yu no ta abo, e no por bira ni komportá manera abo. Respetá su posibilidatnan i yudé krese bira su mes. No ta bo soñonan e mester realisá, sino di dje. Siña skucha i mira kiko ta su soño, òf siñe deskubri su soño. Un felis fin di siman pa bo i tur esnan ku bo ta stima.

**Not'è riba bòrchi**  
**85 aña st. Albertus College**



**Riba rapòrt**  
**Jubilaris na kantor di RK**



**Mirla Isidora a kumpli 30 aña den servisio di RK. Mirla ta laborá den nos departamentu di atministrashon finansiero. Mirla ta un trahadó ku pashon pa nos muchanan. Danki Mila pa e kurason di oro i e bon trabou durante 30 aña.**



**Carl Pieterella a kumpli 25 aña den servisio di RK. Carl ta un persona masha kreativo. Banda di su trabounan den offset i bode e ta semper kla pa duna un man ora mester hasi trabounan di pinta òf deiseña. Kantamentu ta su hobby i semper e ta kla pa alegra tur presente ku su kanto.**

## **Den agènda**

**Dianan liber di skol**

- **Fakansi grandi 4 yuli te ku 10 ougustus 2016**

**Konferensha pa personal skolnan katóliko 8 di ougustus 2016**

**Promé dia di skol pa alumnonan ta 11 di ougustus 2016.**

## **Mi ta konta**

Marelva ta korda ku dia e tabata chikitu, su tata tabata pidie pa yuda e tata ora e tabata planta den kurá. E ta pidie tene e slang, kue e harpa i yude kòrta e matanan. Ora su tata tabata laba outo semper e tabata pidie bin yude spuit e outo. Anto semper nan tabata kombersá ku smak durante e aktividatnan.

Despues ku Marelva a krese el a bai studia afo, tur djadomingu su tata tabata yamé pa kombersá un ratu ku ne. Un par di aña despues ku Marelva a kuminsá traha i a kumpra su mes kas, su tata a ofresé pa e mes bin fèrf e kas pe. Durante 3 dia su tata a fèrf e kas, anto de bes en kuando e tabata pidi Marelva pa trese un poko awa òf kòfi p'è. Djis pa e hala un kombersashon ku ne. Pero Marelva, druk ku su mes kosnan semper tabata kòrta e kombersashon pa e sali purá bai antende su asuntunan. Despues ku tabata spera beibi, su tata tabata bin tur dia pa harma e kama di yu, drecha e kamber i tur otro asunto pa e beibi. Atrobe su tata tabata puntra su yu pa bin wak kon e kamber ta keda, djis pa nan papia un ratu, pero semper Marelva tabatin purá i tabata kòrta e kombersashon pa e bai serka su amigunan. Un djadomingu mainta, Marelva a haña un kombersashon di su tata, el a ripará ku su tata tabata un tiki konfundí i ta manera el a lubidá algun kos importante ku nan a palabrá kaba. Pero atrobe Marelva su programa tabata yen i el a sera lihé pa sigui ku su kosnan. Mesun dia, algun ora despues Marelva a haña un yamada, ferfelu. Su tata tabata den hospital paso el a haña un ataka. Purá Marelva a s ali pa bai serka su tata. Na kaminda a pasa manera un film den su kabes kon su tata tabata gusta kombersá ku né. Anto kuantu biaha e tata a purba ultimo añanan , pero Marelva no a traha tempu. Ora Marelva a yega hospital, el a haña e tristu notisia ku su tata a fayese. Marelva a sinti un dolor inmenso. El a realisá kon tiki e tabata sa di su tata su pensamentunan i su soñonan.

Ta un par di luna despues di su tata su fayesimientu, Marelva a siña konosé su tata, pero e mes tambe. Kuantu biaha su tata a buska forma pa konektá ku ne, sin resultado. Kon tur biaha su tata tabatei pe, pero e no a baloré. Anto awor ku e tata no tei mas, tur dia e ta pensa riba dje.

## **Un prechi Maria College ta briya**



Maria College a partisipá na un kompetensia di Youth beach Rugby kontra otro skolnan i a sali ganadó absoluto. Pabien na nos hungadónan ku a hasi un bon trabou! Maria College ta orguyoso di boso!





Pabien na e tim di Maria College ku a pasa e curso básiko di “toetsconstructie” ku éksito. E tabata un temporada di hopi esfuerso i trabou pero awor nos ta disfrutá di dje ku e sertifikado den nos man. Pabien un biaha mas, boso meresé!

## **Mucha djispou**

**Romoldo a para un taksi pa hibe èrport.**

**Romoldo:** “Kuantu di aki pa èrport, mener?”

**Taksista:** “40 dollar.”

**Romoldo:** “Anto kuantu pa hiba e 2 maletanan aki?”

**Taksista:** “Eseinan ta bai gratis.”

**Romoldo:** “Hopi bon, hiba e maletnan aki numa pa mi, ami ta buska un lift bin tuma nan na èrport.”